

প্রথম আলো

১৮ সেপ্টেম্বর ২০০৮

৩ আশ্বিন ১৪১১

২৮১

স্বাধীনতা আন্দোলন

# ছাত্রের দিনে

## হামিদা হোসেনের মিশন

মানুষের কল্যাণে আইন








# হামিদা হোসেনের মিশন মানুষের কল্যাণে আইন

সাধারণ মানুষের মধ্যে আইন বিষয়ে সচেতনতা তৈরি করা এবং তাদের আইনি সহায়তা দেওয়ার লক্ষ্য নিয়ে দীর্ঘদিন ধরে কাজ করে চলেছেন হামিদা হোসেন। প্রচারবিমুখ এই নীরবকর্মীর সঙ্গে কথা বলে তার জীবন ও কর্ম সম্পর্কে বিস্তারিত জানাচ্ছেন জাহিদ হোসেন



**বাং**লাদেশের মানবাধিকার নিয়ে যারা কাজ করছেন হামিদা হোসেন তাদের অন্যতম পুরোধা। বঙ্গবন্ধু জনগোষ্ঠীর আইনগত অধিকার রক্ষার জন্য খুরশীদ এরফান ও সালমা সোবহানের সঙ্গে হামিদা হোসেন ছোট আকারে যে আইন ও সালিশ কেন্দ্র প্রতিষ্ঠা করেছিলেন গত শতকের আশির দশকে তার কার্যক্রম এখন বিস্তৃত হয়েছে। এদেশের সাধারণ মানুষের অধিকার প্রতিষ্ঠায় এই প্রতিষ্ঠানটি গুরুত্বপূর্ণ ভূমিকা পালন করছে। বিভিন্ন জনসম্পৃক্ত বিষয়ে হাইকোর্টে জনস্বার্থে মামলা করে আইন ও সালিশ কেন্দ্র অধিকার প্রতিষ্ঠা করতে সক্ষম হয়েছে। এ গুরুত্বপূর্ণ প্রতিষ্ঠানটিকে এখন এগিয়ে নিয়ে যাচ্ছেন প্রচারবিমুখ হামিদা হোসেন। স্বাধীনতা-যুদ্ধ-পরবর্তী সময়ে নানাভাবে নিগৃহীত দুর্দশাগ্রস্ত নারীরাই তাকে আগ্রহী করে তোলে অবহেলিত মানুষের সঙ্গে কাজ করতে।

## ছেলেবেলা সিদ্ধে

হামিদা হোসেনের মায়ের নাম মারিয়ম শেখ এবং বাবার নাম আবদুল্লাহ আখন্দ। তার ছেলেবেলা কেটেছে পাকিস্তানের সিদ্ধ প্রদেশে। 'তখন সিদ্ধের মুসলমানদের মধ্যে শিক্ষা-দীক্ষা খুব একটা ছিল না। বেশিরভাগ পরিবারের মধ্যে বড় জমিদার। তবে আমরা জমিদার ছিলাম না, সেটা বোধ হয় ভালো হয়েছে।' বলে একটু হাসলেন হামিদা হোসেন। জমিদার না হওয়ার সুফলটা ব্যাখ্যা করলেন— 'ওখানের জমিদাররা খুব গোড়া হতো। তাদের মেয়েরা খুব পর্দায় থাকত। পড়াশোনা হতো না।' কিন্তু হামিদা হোসেনের পরিবার খুবই উদারদ্বী ছিল। তার বাবা ছিলেন জেলা জজ। চাকরির কারণে ছোট ছোট শহরে যেতেন। সেখানে মেয়েদের স্কুল থাকত না। ফলে লেখাপড়ার জন্য বাধ্য হয়ে তারা সবাই করাচিতে থাকা শুরু করলেন, সেখানে থেকেই পড়াশোনা করতেন। তার বাবা শুধু বদলির আদেশ অনুযায়ী বিভিন্ন এলাকায় যেতেন। ১৯৪৭ সালে যখন ভারত বিভাগ হলো, তখন অনেক পরিবর্তন এল। পাঞ্জাবের মতো সিদ্ধে বড় ধরনের দাঙ্গা হয়নি। 'আমার যতটুকু মনে আছে, পূর্ব পাঞ্জাব থেকে যখন মানুষ আসতে শুরু করল, তখন পরিবর্তন দেখতে পেলাম। আমি যে স্কুলে পড়তাম, সেখানে হিন্দু-মেয়েরা বেশি ছিল। ৬০০ জনের মতো ছিল হিন্দু আর জনাপঞ্চাশেক মুসলমান। অথচ ১৬ আগস্টের পর দেখা গেল স্কুল একেবারে খালি হয়ে গেছে। আমরা ৫০ জন আছি, আর কেউ নেই।' দাঙ্গা সরাসরি না দেখলেও অচিরেই টের পেয়ে গিয়েছেন তার ভয়াবহতা, বিশেষ করে ভারত থেকে আসা শরণার্থীদের দেখে। ভারত থেকে তখন নানাভাবে ট্রেনে ও ট্রাকে এসেছে অনেকে। পথে তাদের ওপর আক্রমণ হয়েছে। একেকটা ট্রেন আসছে, তা থেকে নামছে লাশ; আর আহতদের আহাজারিতে ভারী হয়ে উঠছে বাতাস। 'তখন আমি স্কুলে পড়ি, তবুও স্কুলের অন্য শিক্ষার্থীদের সঙ্গে মিলে তাদের সহযোগিতার চেষ্টা করি।'

## পড়াশোনা করতে বিদেশ

'১৬-১৭ বছর বয়সে আমি বৃত্তি নিয়ে আমেরিকার ওয়েলেসলি কলেজে পড়তে চলে গেলাম।' জানালেন হামিদা হোসেন। তবে ওটাই তার প্রথম আমেরিকা সফর নয়। '১৯৫২ সালের একটা রচনা প্রতিযোগিতায় প্রথম হওয়ার সুবাদে আমার তিন মাসের জন্য আমেরিকায় যাওয়ার সুযোগ হয়েছিল। সেখানে হাইস্কুল-পড়াদাদের সঙ্গে থাকতে হয়েছিল। নিউইয়র্ক ও ওয়াশিংটনের হাইস্কুলগুলো ঘুরে দেখার সুযোগ হয়েছিল।' ওই সফরই যে তাকে

আমেরিকায় পড়াশোনা করার ব্যাপারে আগ্রহী করে তোলে জানালেন সে কথা। সে কারণেই ওয়েলেসলি কলেজে পড়তে যাওয়া। সেখানে তিন বছর পড়াশোনা করে বিএ ডিগ্রি নিয়ে করাচিতে ফিরে এসে প্রকাশনা সংস্থায় সম্পাদক হিসেবে কাজ শুরু করলেন।

## ঢাকায় এলেন

১৯৬২ সালে ঢাকায় আসেন হামিদা হোসেন। করাচি খুব বড় শহর ছিল। মানুষজনের সঙ্গে মেশার সুযোগ ছিল কম। করাচির তুলনায় তখন ঢাকা নিতান্তই পুঁচকে একটা শহর। দু দিনেই সবার সঙ্গে পরিচয় হয়ে যায়। করাচিতে অন্য রকম, যে যার মতন থাকত। খুব বেশি জানাশোনা ছিল না কারো সঙ্গে। রেহমান সোবহান, সালমা সোবহানকে চিনতেন। ঢাকায় স্থায়ীভাবে আসার আগে তার বোন খুরশীদা এরফানের কাছে একবার বেড়াতে এসেছিলেন। ঢাকায় এসে ছোট কিন্তু আন্তরিক এক পরিবেশে নিজের জায়গাটা করে নিতে পারলেন সহজেই। তখন ঢাকা বিশ্ববিদ্যালয়ের পরিবেশ ছিল চমৎকার। বিশ্ববিদ্যালয়কেন্দ্রিক একটা পরিচিত গোষ্ঠী তৈরি হলো অল্প সময়েই। তাদের সঙ্গে খুব ভালো সময় কাটছিল। সমস্যা ছিল শুধু একটা, সেটা ভাষা নিয়ে। 'বাংলা তখন একেবারে জানতাম না। খুব খটোমটো লাগত। আড্ডায় মাঝে মাঝেই আটকে যেতাম। তবে বিশ্ববিদ্যালয়ে যাদের সঙ্গে পরিচয় হয়েছিল, তারা ইংরেজি-বাংলা দু ভাষাই ব্যবহার করতেন বলে বেঁচে যেতাম।' ভাষার সমস্যাটা অবশ্য পরে মিটে গেছে নিয়মিত প্রাতিষ্ঠানিক শিক্ষায়। 'বিয়ের (১৯৬৪) পর আমি বাংলা একাডেমির একটা কোর্সে ভর্তি হলাম। তখন ছয় মাসের একটা কোর্স ছিল। আমার সঙ্গে তখন ছয়জন চীনাও ছিল, তারা খুব নিবিড়ভাবে ভাষাটা শিখল। তখন অধ্যাপক মুনীর চৌধুরী, অধ্যাপক আনিসুজ্জামানসহ কয়েকজন আমাদের ভাষা শেখাতেন। কোর্সটা খুব ভালো ছিল। ছয় মাসের মধ্যে আমরা অনেকটা শিখতে পারলাম। তা ছাড়া প্রতিদিন মানুষের সঙ্গে কথা বলতে বলতেও অনেকখানি শিখে গেলাম। ১৯৬৭ সালে আমরা কয়েকজনের একটি গ্রুপ মিলে একটি রাজনৈতিক সাপ্তাহিক বের করা শুরু করলাম। পত্রিকাটির নাম ছিল ফোরাম। ইংরেজি ওই পত্রিকার নির্বাহী সম্পাদক ছিলেন রেহমান সোবহান। আমি সম্পাদক আর কামাল হোসেন ছিলেন এর প্রকাশক। তো, পত্রিকাটি যখন বের করলাম (সংবাদের ছাপাখানা থেকে ছাপানো হতো), তখন প্রতি সপ্তাহে ছাপাখানায় গিয়ে বাংলায় কথা বলতে হতো কর্মীদের সঙ্গে।' এভাবে বলতে বলতে তার মুখে চালু হয়ে গেল মিষ্টিমধুর বাংলা।

## পরিবার পরিজন

'১৯৬২ সালে আমি আমার বোনের সঙ্গে দেখা করতে ঢাকায় আসি। তখনই ড. কামাল হোসেনের সঙ্গে আমার পরিচয়। এরপর তিনি করাচিতে গেলে সেখানে তার সঙ্গে আবার দেখা হয়। আমাদের বিয়ে হলো ১৯৬৪ সালে লন্ডনে।' নিজের বিয়ের প্রসঙ্গে সংক্ষেপে জানালেন হামিদা হোসেন। দুই সংস্কৃতির দুইজনের মিলনে কোন প্রতিবন্ধকতা তৈরি হয়নি। 'কামালের বন্ধুরা খুব প্রগতিশীল ছিলেন। কামালের পরিবারও ছিল তেমনি। ফলে এখানে এসে আমাদের খাপ খাওয়ানোর চেষ্টা করতে হয়নি। কামালের পরিবার খুব রক্ষণশীল হলে অবশ্য পরিস্থিতি ভিন্ন হতে পারত।' বললেন হাসতে হাসতে।



নিউইয়র্ক হেরাল্ড ট্রিবিউন ফোরামের আমন্ত্রণে যখন হামিদা হোসেনের দু মেয়ে সারা হোসেন আর দিনা হোসেন। সারা হোসেন লন্ডনে পড়ালেখা শেষ করে এখন আমেরিকায় যান, ১৯৫২। সঙ্গে ফোরামের সভাপতি



সুপ্রিম কোর্টে আইন পেশায় নিয়োজিত। আর ছোট মেয়ে দিনা ছবি তৈরি করেন। ছবি তৈরির বিষয়ে পড়তে নিউইয়র্ক গিয়েছেন। এখন সেখানেই আছেন। 'মাটির ময়না'র দু-এক মাস কাজ করলেও দিনা মূলত আমেরিকাতেই কাজ করেন। ওর মূল কাজ প্রামাণ্যচিত্র নির্মাণ। থিসিস হিসেবে বাংলাদেশী কবি আলেয়ার ওপর একটি চলচ্চিত্র নির্মাণ করেছেন তিনি। আলেয়ার বাংলাদেশ ছেড়ে বিদেশে যাওয়া এবং সেখানে গিয়ে প্রতিষ্ঠা পাওয়া- এসব বিষয় সে তুলে এনেছেন সেলুলয়েডে।

#### অক্সফোর্ড ইউনিভার্সিটি প্রেস এবং

ষাটের দশকে ঢাকায় আসার পর এখানে অক্সফোর্ড ইউনিভার্সিটি প্রেস নামে একটি প্রকাশনা সংস্থায় সম্পাদক হিসেবে কাজ করেছেন হামিদা হোসেন। 'আমি যখন এখানে এলাম, তখন রাজনীতিতে বেশ গরম বাতাস ছিল। কিন্তু আমার অবস্থান ছিল দর্শকের মতো'— বললেন হামিদা হোসেন। 'তবে সে সময় আমার সঙ্গে যাদের পরিচয় হলো, তারা সবাই সে সময়ের উত্তাল আন্দোলনের সঙ্গে যুক্ত ছিলেন। যেমন— শহীদুল্লা কায়সার, অধ্যাপক আনিসুজ্জামান, রেহমান সোবহান, অধ্যাপক রাজ্জাক প্রমুখ।' ফলে সরসরি যুক্ত না থাকলেও আন্দোলনের আঁচটা ঠিকই টের পেতেন। তারপর সংবাদে কাজ করার সূত্রে বজলুর রহমানদের সঙ্গে যোগাযোগ হলো। ফলে আন্দোলন থেকে দূরে থাকা সম্ভব হয়নি। একসময় তারা বন্ধুরা মিলে একটা পত্রিকা বের করার উদ্যোগ নেন। ১৯৬৫ সালে রাজনীতি বিষয়ক ওই সাপ্তাহিক পত্রিকার ডিক্লারেশনের জন্য সরকারের কাছে দরখাস্ত দিয়েছিলেন তারা। তখন পত্রিকার প্রকাশনার অনুমতি পাওয়া সহজ ছিল না। ফলে দরখাস্ত করে দু বছর বসে থাকতে হয় তাদের। ১৯৬৭ সালের দিকে সরকার অনুমতি দিলে তারা নিয়মিত পত্রিকাটি প্রকাশ করতে শুরু করেন। ১৯৭১ সালের ২৫ মার্চ শেষ সংখ্যাটি ছাপাখানায় যাওয়ার কথা ছিল। কিন্তু ওই রাতের পর আর সেটা প্রকাশিত হয়নি। পরের নয়টা মাস তার কেটেছে আতঙ্কে, উত্তেজনাতে। 'এখন যেটা প্রেস ইনস্টিটিউট, সেখানে আমরা তখন থাকি। দোতলা বাড়ির নিচতলায়। ২৫ মার্চ রাতেই আমাদের বাসায় আর্মি এল কামালকে খুঁজতে। কিন্তু ও তখন বাসায় ছিল না। কার্য্য ভাঙলে আমি অন্য একজনের বাসায় গিয়ে আশ্রয় নিলাম। কিন্তু সেখানে থাকটাও কঠিন হয়ে পড়ল। এ অবস্থায় বাচ্চাদের নিয়ে আমি বাবার কাছে চলে গেলাম।'

#### অসহায় নারীর পাশে

মুক্তিযুদ্ধের পর আবার অক্সফোর্ড ইউনিভার্সিটি প্রেসে যোগ দিলেন হামিদা হোসেন। কিন্তু তখন পরিবেশটা ঠিক কাজ করার মতো ছিল না। চারদিকে অসংখ্য নারীর আত্ম হাহাকার। নিজের সমস্ত হারানোর বেদনা, স্বজন হারানোর কষ্ট, নিঃসহায় নিঃসম্বল অসংখ্য নারীর দিকে মুখ তুলে তাকানো যায় না। তাদের জন্য একটা কিছু করা দরকার— এই তাগিদ অন্তরে বাজতে লাগতে লাগল হামিদা হোসেনের। 'যুদ্ধে নানাভাবে ক্ষতিগ্রস্ত বিপর্যস্ত নারীরা আমার সঙ্গে দেখা করতে আসত। তাদের কোথাও আশ্রয় নেই। যাওয়ার কোনো জায়গা নেই। ধর্মিত হওয়ার কারা অনেক মেয়ে নিজের বাড়িতে পর্যন্ত উঠতে পারেনি। বেঁচে থাকার জন্য তাদের অর্থের প্রয়োজন ছিল ভীষণ। ওরা তখন মরিয়া হয়ে একটা অবলম্বন খুঁজছিল।' এসব মেয়ের বেঁচে থাকার একটা অবলম্বন খুঁজে বের করতেই লিলা আমির-উল ইসলামের সঙ্গে মিলে গড়ে তোলেন একটি সংগঠন— 'সৃজনী'। কার্গিশিল্লের প্রসারের জন্য তিনি আগে থেকেই কাজ করতেন। তার সেই প্রচেষ্টারই অংশ ঢাকা শেরাটন হোটেলের নিকটবর্তী প্রতিষ্ঠান কারিকা। সেখানে মেয়েরা হস্তশিল্পের নানা জিনিস তৈরি করত বিক্রির জন্য। 'ভাবলাম সেখানেও ওদের কাজে লাগানো যায় কি না। আমাদের দক্ষ কর্মীদের পাশাপাশি ক্ষতিগ্রস্ত এ নারীদের এখানে যুক্ত করতে লাগলাম। ফলে ওই নারীদের আর্থিক সমস্যার কিছুটা সমাধান হলো।'



আমেরিকার ওয়েলেসলি কলেজে

#### পঁচাত্তরের উদ্বিগ্ন দিনগুলো

১৯৭৫ সালের বঙ্গবন্ধুকে যখন সপরিবারে হত্যা করা হলো, ড. কামাল হোসেন তখন পররাষ্ট্রমন্ত্রী। তিনি রাষ্ট্রীয় কাজে দেশের বাইরে ছিলেন। হত্যাকাণ্ডের খবর শুনে ওখানেই থেকে গেলেন। হামিদা হোসেনও কিছুদিন পর লন্ডনে চলে গেলেন। সেখানে অক্সফোর্ডে থেকে গেলেন তারা। 'এ সময়ে আমি আমার পিএইচডি করলাম। আর তো কিছু করার ছিল না।' বললেন যদিও, তবে পিএইচডির বিষয়টি নিঃসন্দেহে তার জন্য ছিল আকর্ষণীয়। আঠারো ও ঊনবিংশ শতাব্দীর বাংলার তাত্ত্বিক নিয়ে গবেষণা করলেন কারিকার এই কত্রী। উল্লেখ্য, এর আগে তিনি বিএ করেছেন ইতিহাস ও সাহিত্যে। এবার পিএইচডি করলেন ইতিহাসে। শুধু যে গবেষণার নির্যাস জগতেই অষ্টপ্রহর কাটিয়ে দিয়েছেন, তা নয়। 'আমরা যখন অক্সফোর্ডে পড়াশোনা করছি, তখন রেহমান সোবহান, সালমা সোবহান তারাও অক্সফোর্ডে ছিলেন। একসঙ্গে থাকার ফলে নানা ধরনের কথাবার্তা হতো। সালমা সোবহান ঢাকা ইউনিভার্সিটিতে আইন পড়াতেন। আমি যেহেতু নারী সংগঠনের সঙ্গে তখন জড়িত ছিলাম, তাই নারীদের অর্থনৈতিক সমস্যার সঙ্গে বেশি পরিচয় ছিল। সালমা সোবহানের সঙ্গে এ নিয়ে আলোচনা করতাম।' দেশে না থেকেও এভাবে দেশের নারীদের সমস্যা সমাধানের উপায় খুঁজে বের করার চেষ্টা চালিয়ে যেতেন তিনি তখনো। পরে দেশে ফিরে যখন নারীদের সমস্যা সমাধান কাজে নামেন, ওইসব আলোচনা কাজে লেগেছিল তার।

#### আইন ও সালিশি কেন্দ্র গুরুত্বপূর্ণ কথা

১৯৮২ সালে দেশে ফিরে আসেন হামিদা হোসেন। তখন দেশে এরশাদের শাসন চলছে। সেসময় বাংলাদেশ মহিলা পরিষদের সঙ্গে সম্পৃক্ত থেকে নারী আন্দোলনের কাজে যুক্ত হয়েছেন তিনি। কবি সুফিয়া কামালের নেতৃত্বে দেশে তখন নারী আন্দোলন তীব্ররূপে

নিয়েছিল। ওদিকে সেনা শাসনের বিরুদ্ধে অনেকেই গণতন্ত্রের সংগ্রামে নিজেদের যুক্ত করেছেন তখন। তাদের মধ্যে হামিদা হোসেনের বন্ধুরাও ছিলেন। শৈরতন্ত্রের বিরুদ্ধে আন্দোলন করলেও নিজেদের মধ্যে আলাপের সময় আমরা বলতাম, গণতন্ত্র মানে আর কি, একটা নির্বাচন হবে, একটা নতুন সরকার আসবে, আবার শৈরতন্ত্র কাজ করবে। এটা তো ঠিক গণতন্ত্র না।'

এরশাদ পতনের পর সবকিছু দেখে শুনে হামিদা হোসেনের আবারও মনে হলো, যারা খুব দরিদ্র নারী-শিশু অথবা যারা খুব অসহায়, ক্ষমতার কাছে নেই, যেমন— সংখ্যালঘু ও এজাতীয় সম্প্রদায়, তাদের নাগরিক হিসেবে অধিকার আদায়ের ক্ষেত্রে কিছু করা। এদের অধিকার আদায়ের সংগ্রামে অংশ নেওয়া। হয়তো তারা জানেই না, তাদের কোথায় কতটুকু অধিকার আছে। আবার জানলেও কোথাও আইনি সহায়তা তারা পাচ্ছে না। 'আমাদের চিন্তা হলো আমরা তো গণতন্ত্রের আন্দোলনে অনেক ছিলাম। রাস্তায় অনেক মিছিল-মিটিং করলাম। আমাদের চিন্তা ছিল, হয়তো শৈরতান্ত্রিক সরকার চলে যাবে। কিন্তু তা হয় না। এক ধরনের শৈরতান্ত্রিক ভাব সরকারের মধ্যে থেকেই যায়। শুধু সরকার নয়, সমাজের সকল স্তরে যাদের হাতেই ক্ষমতা থাকে, তারাই সব সময় অন্যদের চাপিয়ে রাখতে চায়। এটা পরিবার এবং গোষ্ঠী সব ক্ষেত্রেই সত্য'— বেশ জোর দিয়ে কথাগুলো বললেন হামিদা হোসেন।

অচিরেই কাজে নেমে পরলেন তারা। 'প্রথমে আমরা ভাবলাম, যারা নানা ক্ষেত্রে অসহায়, তাদের জন্য আইন-সহায়তার একটা ব্যবস্থা করা যেতে পারে। বিচারপতি কে এম সোবহান, ব্যারিস্টার আমির-উল ইসলাম, তায়রুনুসা আবদুল্লাহ, ফজলে হাসান আবেদ, অ্যাটর্নি জেনারেল আমিনুল হক, সালমা সোবহান, আবদুল খালেক, খুরশিদ ইরফান আহমেদসহ আমরা নয়জন ছিলাম। সঙ্গে কয়েকজন উদ্যমী তরুণ আইনজীবী ছিলেন।'

ড. খান সারওয়ার মুর্শেদ ও তার স্ত্রী সাংসদ নূরজাহান মুর্শেদ সাহায্য করেছেন। ধানমন্ডির সাতমসজিদ রোডে তাদের বাড়ি ছিল। বাড়ির প্যারাজে দুটি রুম খালি ছিল। সেই রুম দুটোতেই আইন ও সালিশি কেন্দ্রের (আসক) অফিস শুরু হয়। ওখানে আইনজীবীরা বসতেন। তারপর জোনাকী সিনেমা হলের পাশে একটা অ্যাপার্টমেন্টে দু-তিনটা রুমে অফিস স্থানান্তর করেন। এক বছর পর্যন্ত ব্যারিস্টার আমির-উল ইসলাম অ্যাপার্টমেন্টের ভাড়া দিতেন। তারপর পুরানা পল্টনের বর্তমান ঠিকানায় চলে আসেন।

প্রথমদিকে পুরো কার্যক্রমটা স্বেচ্ছাশ্রমভিত্তিক ছিল। প্রতিদিন সময় করে ঘটাদুয়েকের জন্য বসতেন তারা। 'তখন আমরা কয়েকজন তরুণ আইনজীবী নিয়ে একটা অফিস চালানোর সিদ্ধান্ত নিলাম। আস্তে আস্তে কাজের পরিধি বাড়াই। বস্তিতে যেতে শুরু করি, যাতে আর দশজন জানতে পারে— এ ধরনের কাজ হচ্ছে। তখন অন্যরাও সহযোগিতা পাওয়ার জন্য যোগাযোগ করতে থাকেন।' তবে সেই যোগাযোগও ছিল খুব দুর্বল,



১৯৭৩ সালের স্বাধীনতা দিবস অনুষ্ঠানে অতিথিদের আসনে বসে আছেন ড. কামাল হোসেন বামে এম এ জে ওসমানি ও অন্যান্য গণ্যমান্য ব্যক্তিবর্গ



প্রয়োজনের তুলনায় ছিল অনেক কম।

### গোড়ার যত বাধা

জগতের অধিকাংশ ভালো কাজের শুরুতেই বাধা এসেছে। আইন ও শালিস কেন্দ্র (আসক) তার ব্যতিক্রম নয়। 'গোড়ার দিকে মানুষ সহজে আমাদের কাছে আসত না। নিজেরা কিছুটা হতাশ হয়ে পড়লাম এই ভেবে যে, আমরা যাদের জন্য এত কাজ করব বলে চিন্তাভাবনা করছি, তারাই এগিয়ে আসছে না। কেউ আমাদের কাছ থেকে সহযোগিতা নিচ্ছে না।' তারা তখন আবার ভাবতে শুরু করলেন, কী করা যায়। শুধু কালো কোট পরে আইনজীবীদের বসে থাকলে হবে না। মানুষের অধিকার আদায়ে আইনকে তারা কীভাবে ব্যবহার করতে পারেন, কেমন করে মানুষকে এটা বোঝানো যায়, সে চেষ্টা করা হলো। এরপর তাদের মিশন হলো বস্তিতে বস্তিতে গিয়ে বোঝানো- প্রচলিত আইনে তাদের কী কী প্রাপ্য আছে, অধিকার আছে, আইন সহায়তার জন্য কীভাবে সংগঠনগুলোর কাছে যেতে হয়, কার কাছে যেতে হবে ইত্যাদি। যে সব সংগঠন আগে থেকেই বস্তিবাসীদের নিয়ে কাজ করছিল, তাদের সঙ্গেই সেখানে গেলেন তারা। কারণ ভয় ছিল, সরাসরি গেলে ওরা তাদের গ্রহণ নাও করতে পারে। এতে কিছুটা কাজ হলো। বেশ কিছু মৌলিক বিষয়, যেমন- বিয়ে করতে যাচ্ছেন, একটা কাবিননামা রেজিস্ট্রেশন করুন। এ ধরনের জিনিস, যার সঙ্গে আইনগত অধিকারের বিষয়গুলো সম্পর্কযুক্ত, সেগুলো সম্পর্কে একটা সচেতনতা তৈরি হলো।

প্রথম বাধাটা এল বস্তির মাস্তানদের কাছ থেকে। 'তেজগাঁও এলাকার একটি বস্তিতে আমরা খবর পেলাম, এক স্বামী তার স্ত্রীকে তাড়িয়ে দিচ্ছে। আমরা স্ত্রীকে আইনগত সহায়তা দিতে গেলাম। তখন ওই মহিলার স্বামী স্থানীয় একটা মাস্তান গ্যাং দিয়ে আমাদের ওপর হামলা চালানোর চেষ্টা করল। তাদের কথা, আমরা কেন তাদের বিষয়ে হস্তক্ষেপ করছি। সে যাত্রায় আমাদের ওই বস্তি থেকে পালিয়ে আসতে হলো।' সেদিন চলে এলেও পরে স্থানীয়দের সঙ্গে যোগাযোগ করে আবার সেখানে গেলেন তারা- 'আমরা মেয়েটিকে তার অধিকার আদায়ের সংগ্রামে সহযোগিতা দিলাম। স্থানীয় বাসিন্দাদের সহযোগিতা নিয়ে তাকে আইনগত সহায়তা দেওয়া হলো। এ রকম অনেক ছোটখাটো সমস্যার ভেতর দিয়ে আমাদের যেতে হয়েছে। কোনো ঘটনা ঘটলে নিজেদের মধ্যে আলোচনা করে সিদ্ধান্ত নিতাম। কখনো কখনো পুলিশেরও সহযোগিতা নিতে হয়েছে।' কাজ করতে গিয়ে তাদের মনে হলো, এই যে তারা শুধু আইনগত সহায়তা দিচ্ছেন, তার অন্তিম ফল কী? এভাবে দু-একটা কেস উদ্ধার করে তো বিশেষ লাভ নেই। নীতিগত পরিবর্তন আনলে হয়তো কিছু হতে পারে। কিন্তু সেখানে বসে আছে সদাশয় সরকার। সে এক জগদল পাথর। ওকে নড়ানো যায় না, চড়ানো



স্বামী ড. কামাল হোসেন ও কন্যা সারার সঙ্গে

যায় না। 'সুতরাং আমরা চেষ্টা করলাম, নাগরিক হিসেবে সবাইকে একটু অ্যাকটিভ করতে। আমরা নিজেরাই যদি অ্যাকটিভ না হই, তাহলে যারা ক্ষমতায় আছেন তারা তো খেয়ালও করবেন না।' সুতরাং তারা ঠিক করলেন সাধারণ মানুষের মধ্যে সচেতনতা সৃষ্টি করতে হবে। 'আমরা যখন আইন সহায়তার কথা বলি, তার অর্থ এই নয় যে আমরা মানুষকে শুধু আদালতে নিয়ে যাচ্ছি বা দুজনের মধ্যে বিরোধী মীমাংসা করছি। আমরা আরো নানাদিকে কাজ করতে লাগলাম। যেমন- কোনো মামলা হলে আমরা নিজেদের মতো করে স্বাধীনভাবে তদন্ত করি।' বছর-দুয়েক পর তারা ত্রিমাসিক একটি 'বুলেটিন' প্রকাশ শুরু করলেন। শুরু করলেন নিয়মিত গবেষণা। নিয়মিত পত্রিকা ক্লিপিং করতে লাগলেন। তাতে পুরো দেশের একটা চিত্র পাওয়া যেত। এভাবে শুধু আইন সহায়তার জন্য যে কাজ শুরু তারা করেছিলেন, ছড়িয়ে পড়ল নানাদিকে।

### আন্তর্জাতিক অঙ্গনে আসক

প্রায় দেড় যুগ পাড়ি দেওয়ার পর আজ আইন ও শালিস কেন্দ্র (আসক) শুধু দেশে নয় বরং দেশের গণ্ডি পেরিয়ে আন্তর্জাতিক পর্যায়েও গ্রহণযোগ্যতা অর্জন করতে পেরেছে। 'আমরা ইউনেস্কোর পরামর্শক মর্যাদা লাভ করেছি। বিভিন্ন আন্তর্জাতিক সভায় আসক অংশ নিয়েছে। এগুলোর মধ্যে ডব্লিউএলইউএমএল, এপিডব্লিউএডি প্রতিষ্ঠান সম্মেলন উল্লেখযোগ্য।' জানালেন হামিদা হোসেন। 'অনেকেই কাজ করার সময় চিন্তা করেন, এ সরকার আছে বলব কি না, ওই সরকার থাকলে

কোনটা বলা দরকার। কিন্তু আমরা আইন ও শালিস কেন্দ্রে সেভাবে চিন্তা করিনি। আমরা যেখানেই দেখি, সরকার ক্ষমতার অপব্যবহার করছে বা অধিকার লঙ্ঘন হচ্ছে, সেখানে আমরা চলে যাই। যখন আমাদের কাছে কেউ আসে, আমরা কাজ করি। সে কোন দলের, কী বৃত্তান্ত- এসব নিয়ে মাথা ঘামাই না।' আইন ও শালিস কেন্দ্রের কাজের পরিবেশ প্রসঙ্গে বললেন, 'ওখানে মেয়েরা বেশি কাজ করে। আমরা যারা ওখানে আছি, সবাই বোধ হয় একটু ক্যাজুয়ালি বড় হয়েছি। বাংলাদেশে তো দেখি শ্রেণীবিভাগটা খুব শক্ত। কাকে সম্মান করব, করব না- এসব নিয়ে অনেক ভাবনা-চিন্তা। আইন ও শালিস কেন্দ্রে এটা নেই। পরিবেশটা অনেকটা ঘরের মতোই। অন্য সংগঠনের চেয়ে আমরা একটু ভিন্ন। কোনো কাজের জন্য ডাইরেক্টরের স্বাক্ষরের জন্য আমাদের অপেক্ষা করতে হয় না। যার যার কাজের জন্য নিজেই সিদ্ধান্ত নিতে পারছেন। যারা তদন্ত করতে যাচ্ছেন, তারা স্বাধীনভাবে কাজ করছেন।'

### মানবাধিকার রক্ষায়

'গত নির্বাচনের পর যখন আমাদের দেশে সংখ্যালঘুদের ওপর হামলা চালানো হলো, তখন অনেকেই ঢাকায় বসে বললেন- না, এমন কিছু তো ঘটছে না। পত্রিকায় অতিরঞ্জিত খবর ছাপাচ্ছে। আইন ও শালিস কেন্দ্র তখন সরাসরি সেসব জায়গায় গেল। তাদের তদন্তকর্মীরা ভোলা, বাগেরহাট, চট্টগ্রামে গেল। বিষয়টি নিয়ে আমরা হাইকোর্টে একটি রিট আবেদন করি। শুনানি শেষে সংখ্যালঘুদের নিরাপত্তা দিতে কেন নির্দেশনা দেওয়া হবে না, কারণ দর্শাতে

হাইকোর্ট সরকারের প্রতি কলনিশি জ্ঞাপি করেন।' বস্তি উচ্ছেদের সময়ও আইন শালিস কেন্দ্র হাইকোর্টে রিট করেছে। যখন বস্তি উচ্ছেদ হলো তখন বস্তিবাসীরা বিভিন্ন জায়গায় চলে গেলে আইন শালিস কেন্দ্র থেকে তারা নিজেরাই উদ্যোগ নিয়ে তাদের সঙ্গে যোগাযোগ করে জনস্বার্থে মামলাটা করেন। ফতোয়ার বিরুদ্ধেও তারা মামলা করেছেন। এসব চেষ্টাচারিত্রে কি বিশেষ কোনো উপকার হয়? প্রশ্নটা করতেই কিছুটা হতাশ কণ্ঠে হামিদা হোসেন বললেন, 'সবকিছু আসলে আইনের মাধ্যমে করা যায় না। অনেক সময় মামলা খুলে থাকে। আবার খারাপ কোনো কাজের বিরুদ্ধে যখন ভালো কোনো রায় পাওয়ার পরও সে ধরনের কাজ চলতে থাকে। আদালতের নির্দেশের পর সেটা বাস্তবায়ন করার বিষয়ে সরকার বা কারো কোনো পরোয়া নেই। ফলে এ ব্যাপারে আর কী করা যায়! একবার নির্বাচনের মাধ্যমে একটা দল ক্ষমতায় চলে এলে তাদের আর কোনো কিছু নিয়েই মাথাব্যথা থাকে না।' কথা সত্যিই। ১৯৯৮ সালে আদালত 'পুনর্বাসন না করে বস্তি উচ্ছেদ করা যাবে না' বলে রায় দিলেন। অথচ এর পরও বস্তি উচ্ছেদ চলছে। অথবা ধরুন, নারী অধিকারের প্রসঙ্গ। নারী অধিকার নিয়ে জাতিসংঘের সনদের সিডও (CEDAW) (নারীর প্রতি সকল প্রকার বৈষম্য দূরীকরণ সনদ) ব্যাপারে বাংলাদেশের সরকার কী কী অঙ্গীকার করেছিল ১৯৮৪ সালে এবং ২০০৪ পর্যন্ত তার কতটা বাস্তবায়ন করেছে? হামিদা হোসেন জানালেন, এ ব্যাপারে সরকারকে নানা পদক্ষেপ নিতে বাধ্য করেছে বাংলাদেশের একাবদ্ধ নারী আন্দোলন। সর্বশেষ ২০০৪ সালে এ রিপোর্ট দেয় সরকার। এ রিপোর্ট নিয়ে জাতিসংঘের সিডও কমিটি আলোচনা করে। দেশের সকল নারী সংগঠনের মতামত সংগ্রহ করে সেই ভিত্তিকে আসক, মহিলা পরিষদ এবং স্টেপ টয়ার্ডস ডেভেলপমেন্ট বসে একটা ছায়া প্রতিবেদন তৈরি করি। জাতিসংঘের সিডও কমিটিতে তা উত্থাপন করেছে ২০০৪ সালে। চতুর্থ বিশ্বনারী সম্মেলনকে কেন্দ্র করে বাংলাদেশে যত একাবদ্ধ কর্মকাণ্ড গড়ে উঠেছে সেসব প্রক্রিয়ার সঙ্গে আসক যুক্ত এবং কাজ করছে।

### আমার আপন ভূবন : হামিদা হোসেন

আমার নিজস্ব পরিবার এত ছোট আর প্রত্যেকে এত বেশি স্বাধীন যে, এক অর্থে আমাদের জগৎটা ছোট। কিন্তু আমাদের প্রত্যেকের ভালো লাগার জায়গাটা আবার বিশাল। আমরা যখন একসঙ্গে হই, তখন এসব বিষয়ে আলাপ করি। আমাদের প্রত্যেকের নিজস্ব ডায়ালগ আছে। মানবাধিকার বিষয়ে আমি, কামাল, সারা- আমরা সবাই যুক্ত আছি। কিন্তু তার বাইরেও অন্য কাজ আছে, সেগুলো আমরা নিজেদের মধ্যে শেয়ার করি। আবার আমরা আলাদাভাবে এবং স্বাধীনভাবে নিজে নিজের কাজ করি। যেমন- কামাল রাজনীতি করে, হাইকোর্টে প্রাকটিস করে। সারাও নিজের প্রাকটিস করছে কিন্তু আইন শালিস কেন্দ্রের সদস্য। আমার অবশ্য আইনের সঙ্গে খুব সম্পর্ক ছিল না। তবে আইন ও শালিস কেন্দ্রে কাজ করতে করতে এসে আইনের বিষয়ে আগ্রহী হই।

আমরা একে অন্যের ওপর কখনো চাপ দিই না যে এটা করতে হবে। আমরা মেগাদেরও কোনো বিষয়ে কখনো চাপ দিইনি। তারা তাদের পছন্দমতো কাজ করে। তারা নতুন সময়ের মানুষ। তাদেরই সিদ্ধান্ত নিতে হবে, তারা কোনদিকে যাবে। আর চাপ দেওয়ার বিষয়টি আমার মনে হয় অনুচিত। তা ছাড়া মতামতের দিক থেকে আমাদের মধ্যে খুব বেশি দূরত্ব নেই। মতবিরোধ থাকলে কী করতাম, সেটা জানি না। ছুটি তেমন একটা পাই না। যেটুকু পাই লেখালেখি করি। গান শুনতে ভালো লাগে। অনেক সময় কম্পিউটারে বসে কাজ করি। আর ছবি দেখতেও পছন্দ করি। জার্মান কালচারাল সেন্টারে ফিল্ম দেখায়, সেখানেও গিয়ে দেখি।' আমার ভাল লাগার অন্যতম একটি বিষয় লোকশিল্প। এ নিয়ে আমি বিভিন্ন সময় খুব ইনভলভ ছিলাম। এখনো ক্রাফট কাউন্সিলের সঙ্গে নিজেকে যুক্ত রেখেছি। নিজে কখনো রাজনৈতিক দলের সঙ্গে যুক্ত হতে চাই না। আমার মনে হয় সে ক্ষেত্রে কোনো স্বাধীনতা থাকে না।